

Смагұлов С.

**1916 жылғы көтеріліс және  
Жамбыл Жабаев**

Бұл мақалада Қазақстандағы 1916 жылғы көтеріліс, соның ішінде оның ірі ошағының бірі болған Жетісудағы қазақ, халқының ұт-азаттық қозғалысы, олардың ұлы ақын Жамбыл Жабаевтың жырлары мен өлеңдерінде орын алғып, тарихи түрғыдан шынайы көрсетілуі кеңінен қарастырылады. 1916 жылғы көтерілістің ішкі-сыртқы сипатын, қазақ ауылында болған тартыстардың көріністерін, қурестердің шиеленіскең кезеңдерін Жамбыл жырларынан айқын көруге болады. Ақын өз шығармаларында 1916 жыл қарсаңдағы қазақ, халқының ауыр жағдайын, сол кездегі тарихи шындықты шынайы көрсете білген. 1916 жылғы ұт-азаттық қозғалысына Жамбыл ақын белсene катынасты, патша жарлығына қарсы көтерілген халық, бұкарасының қалың ортасында жүрді, өзінің жалынды үндеу жырларын сол қозғалысқа арнап шығарды. Жамбылдың шығармалары – біз үшін қымбат қазына, құнды тарихи дерек. Өйткені, ол 1916 жыл оқиғасына арналған жырларында тарихи шындықты нақты түрде баяндап бере алған. 1916 жылғы ұт-азаттық көтеріліс – Жамбыл ақын шығарма шылығындағы ең негізгі тақырыптардың бірі.

**Түйін сөздер:** Көтеріліс, Жамбыл, ақын, Жәнібек қажы, Самсы көтерілісі.

Smagulov S.

**Rebellion of 1916 and  
Zhambyl Zhabaev**

This article is devoted to rebellion of 1916 in Kazakhstan, including national liberation movement of the Kazakh people in Semirechie as one of large hearts of rebellion, and also reflection of these events in poems of great poet Zhambyl Zhabaev. A poet in the works presented the tight situation of the Kazakh people, historical true of that time. Zhambyl actively participated in national liberation movement of 1916, was among the people acting against king's decree, devoted the flaming invocatory songs to this movement. Poems of Zhambyl for us are precious treasure, very important historical source. Because, in the works he devoted to the events of 1916 certainly and thoroughly expounded a historical true. National liberation rebellion of 1916 is a basic theme in poems of Zhambyl Zhabaev.

**Key words:** Rebellion, Zhambyl, poet, Zhanibek kazhy, Samsy rebellion.

Смагулов С.

**Восстание 1916 года и  
Жамбыл Жабаев**

В этой статье рассматривается восстание 1916 года в Казахстане, в том числе национально-освободительное движение казахского народа в Семиречье, как один из крупных очагов восстания, а также отражение этих событий в творчестве великого поэта Жамбыла Жабаева. Поэт в своих произведениях показал тяжелое положение казахского народа, историческую правду того времени. Жамбыл активно участвовал в национально-освободительном движении 1916 года, находился среди народных масс, выступивших против царского указа, посвятил свои пламенные призывные песни этому движению. Произведения Жамбыла для нас – драгоценное сокровище, очень важный исторический источник. Потому что он в своих произведениях, посвященных событиям 1916 года, конкретно и обстоятельно изложил историческую правду. Национально-освободительное восстание 1916 года – основная тема в творчестве Жамбыла Жабаева.

**Ключевые слова:** Восстание, Жамбыл, поэт, Жанибек қажы, Самсынское восстание.

## 1916 ЖЫЛҒЫ КӨТЕРІЛІС ЖӘНЕ ЖАМБЫЛ ЖАБАЕВ

Биыл бүкіл қазақ даласын дүр сілкіндірген 1916 жылғы ұлт-азаттық қозғалысина 100 жыл, «ХХ ғасырдың Гомері» аталған ақының ақын, қазақ халық поэзиясының алып тұлғасы, өлең сөздің дүлдүлі, жыршы, жырау Жамбыл Жабаевтың туганына 170 жыл толмақ. Бұл тарих табалдырығын енді аттап отырған 2016 жылдың басты оқиғасының бірі десек, қателеспеген болар едік.

Қазақстанның түкпір-түкпірін камтыған ұлт-азаттық көтерілістің басталуына патша үкіметінің 1916 жылғы маусым жарлығы түрткі болып қана қойған жоқ. Елдің әбден титігіна жеткен патша өкіметінің қорлауы, кемсітуі, отарлық саясаты, шүрайлы жерлерді тартып алып, жергілікті халықты қайыршылықта ұшыратуы да көтеріліс отын үрлейді. Бұл – қазақ халқы үшін өте ауыр кезең еді. Торғайдан Амангелді Имановтың, Жетісудан Бекболат Әшекеевтің ел бастап шықкан ерліктері сол күннің өзінде халық арасында жыр болып, анызға айналды.

1916 жылғы көтерілістің ішкі-сыртқы сипатын, қазақ ауылымнда болған тартыстардың көріністерін, құрестердің шиеленіскең кезеңдерін Жамбыл жырларынан айқын көруге болады. Ақын өз шығармаларында 1916 жыл қарсаңдағы қазақ халқының ауыр жағдайын, сол кездегі тарихи шындықты шынайы көрсете білген. 1916 жылғы ұлт-азаттық қозғалысина Жамбыл ақын белсене қатынасты, патша жарлығына қарсы көтерілген халық бұқарасының қалың ортасында жүрді, өзінің жалынды үндеу жырларын сол қозғалысқа арнап шығарды.

Қазақ жастарын окоп жұмысына алады деген хабарды естігендеге ел басына төнген қатерді Жамбыл былай жырлайды:

Верныйдан жандаралдар бұйрық қылды,  
Күйрығы бұйрығының тіпті зілді,  
«Отыз бір – он тоғызды алад» деген  
Суық хабар халықты бұлқындырды [1].

Жамбыл бұрыннан екі жақты қанауда болған енбекшілерге бұл жарлық халықтың басына түскен жасындей, жығылғанға жұдырық деген пікірді айтады, ел халін одан әрі нашарлатып, олардың азаматтық құқықтарын, ар-намысын табанға таптап, жанышқан патша үкіметінің зұлымдығын, жекесүрін кескінін

өткір өлеңмен әшкөрелейді. Ол бұқара халықтың осындағай ауыр жағдайға үшірау себептерінің түп тамырын ашып, елді патшаға бас имеуге, бағынбауға, оның озбұрылығына қарсы күресуге шақырады.

Жамбыл 1916 жылғы ұлт-азаттық көтерілістің туу себептерін, халықтың билеуші топтарға деген қарсылығын жырларында айқын сипаттайды. Мәселен, «Зілді бұйрық» деген өлеңінде:

Пристав келіп қалды бала сұрап,  
Ел жатыр бермейміз деп қойдай шулап.  
... «Қырсаң да баламызды бермейміз», – деп  
Тайсалмай еке-шеше жатыр сұлап [2] –

деп халық наразылығын көрсетеді.

Ол осы көтеріліске қатынасқан, тарихи оқиғаның күесі болған. Сондықтан халық басындағы ауыр халге күйініп, қолына домбырасын кару етіп, елді рухтандырып, патша үкіметінің қанауына қарсы көтеріліске шақырған. Жамбылдың шығармалары – біз үшін қымбат қазына. Өйткені, ол 1916 жыл оқиғасына арналған жырларында тарихи шындықты нақты түрде баяндап бере алған.

Жетісудың губернаторы кейбір жергілікті би, төрелердің дем беруімен Верныйға ақындарды жинап алып, ел ортасында үгіт жүргіз, ақ патшаны мақта деген сыңайдағы бұйрық береді. Сол қүннің өзінде патшаны, соғысты мадақтамадың деп қарт Жамбылды абақтыға да жабады. Жамбыл мұны өзінің «Мениң өмірім» деген жырында төмөнделгідей етіп еске алады:

Ақыны, әнші, күйіші қыруар жан,  
Аймағын Жетісудың жинап алған.  
Сабаннан төсек, ерден жастық істеп,  
Жатарға жай салғызды ат корадан.  
Сорпасы капустаның «ыстығына»  
Сөткесіне кісіре бір кара нан!..  
«Үгіт айт, патшаны мақта!» дейді,  
«Болып жатқан соғысты жакта» дейді.  
«Жыр айтсаң, құдай мен пайғамбарды айт,  
Онан басқа жырынды айтпа!» дейді.

Бұл жырын Жәкең былай аяқтайды:

Үстаган қанды тырнак елді қысты,  
Кім болмақ ызбаланса елден қүшті?  
Жамбыл қарт жетпіс екі жасағанда,  
Николай үрған доптай тақтан түсті.  
...Жабырқаған халықтың көңілі есті [3].

Сөйтіп, Жәкең 1916 жылғы ұлт-азаттық көтерілістің созыла түсіп, 1917 жылғы ақ патшаны тақтан құлатқан Ақпан төңкерісіне ұласқанын айқын көрсетеді. Бұдан отаршылдық пен қанауға

ұшыраған халықтың ашу-ызаға булыққан шақта қандай күшке ие болатындығын байқаймыз. Ондаган жылдар бойы үйкіда жатқан қазақ халқы ел басына күн туып, жау алқымнан алып, жан қысылған кезде өз күш-құдыретін көрсете білді.

Жамбыл Жетісуда болған көтеріліс кезінде жай бақылауши ғана емес, дүрліккен елмен бірге боп, оның жаршысы, жыршысына айналады. Ақын «Зілді бұйрық» жырында ел көтерілісін болған оқиғалар негізінде көрсетеді. 1916 жыл жөнінде жазылған бай фольклор материалының арасынан бұл жырды тапқан профессор Есмағамбет Ысмайлов еken. Өлеңді 1939 жылы Жамбылдың өзіне оқып көрсеткенде мениң жырым мұнан мол еді, бұл оннан бір бөлігі ғана депті. Өлеңнің бірде-бір сөзі өзгермesten 1940 жылы басылған Жамбыл шығармаларының бір томдығына енгізілген. Кейінгі 1946 жылы шыққан толық шығармалар жинағына содан алынады.

Верныйдан 19 бен 31-ді аламыз деп келген пристав отрядына жастар топталып, Қарғалы өзенінің бойында қарсылық көрсетеді. Үсталған жастарды түрмеден босатып, бай, болыстарды өлтіреді. Ақын өз жырында жер, кісі аттарына дейін дәл етіп атауға, болған оқиғаны болған күйінде айтуда тырысады. Онда аталған Бекболат, Саттар, Қалиғұл, Байбосын – Жетісуда көтерілісті бастаған, ақын өз көзімен көрген белгілі батырлар. Ақын бұл жырында тек батырлық дәстүр ғана емес, жалпы халықтық қозғалысты суреттейді.

Верный уезіндегі Қарғалы шұға фабрикасы жұмысшыларымен Үшқоңыр жайлалаудағы Қарамолда деген елдің біріккен ереуілі болады. Ереуілді Бекболат Әшекеев және сарбаздары Байбосын Тамабаев, Қалығұл Сапабаев басқарады. Ереуілді Верныйдан шыққан жазалауши отряд қанға бояп басады. Бекболат пен Байбосынды патша жендеттері ұстап алып халықты қорқыту үшін Алматының солтүстік іргесіндегі Боралдай деген жерде 1916 жылы 9-қыркүйекте дарға асып өлтіреді. Азаттық аңсаған ерін дарға асу арқылы патша әкімдері қазақтың сағын сындырдық деген ойлады. Міне, Жәкең осы оқиғаның ақықатын ашып отыр.

Жамбыл «Зілді бұйрық» жырында Жетісуда, соның ішінде сол кездегі Верный уезінде болған Қарғалы, Самсы, Қастек көтерілістеріне кеңінен тоқталады. Мысалы, жырда Қарғалы көтерілісі туралы былай дөлінеді:

Жиылды бозбалалар бір кезенге,  
«Қарғалы» деген тасқын бір өзенге,

Пристав кетті «еріксіз аламын» деп,  
Көресің бұл істі деп, кезегінде,

Бәрін де ол пристав жаттап алды,  
Басшыларын қағазға қаттап алды.  
Аттандырып, бұл елге солдаттарын,  
Басты-басты кісіні салтап алды.

Күн ыстық, қайнап тұрган сарша тамыз,  
Жанында қан, малында қалмай маңыз.  
Оразаның күні еді сол уақытта,  
Бұл күнде оразаны не қыламыз!

Суында Қарғалының ауыз ашты,  
Бір бәлекет халыққа душарласты,  
Басшылары кеткен соң тағат алмай,  
Жиылған жұрт дағдарып жанталасты.

Келді де, алып кетті жақсыны айдал,  
Барады боздактардың көзі қайнап.  
Күн ыстық, қайнап тұрган сарша тамыз,  
Жөнелді абақтыға соры қайнап.

Жақсыдан жақсы қоймай алды сайлап,  
Қамалды абақтыға қыргыз-қазақ.  
Білмеді не болғанын сырттағы жұрт,  
Қамалғандар тірідей тартып азап.

Шулайды абақтыға қамалған көп,  
Сырттағы жур: «біз енді қайтеміз?» деп.  
Губернатор, жандарал жауапқа алды:  
«Жайлауда ту көтеріп, шапқан кім?» деп.

Ешқайсысы айтпаған соң айғай сап кеп,  
Өзі айтқан жандаралдың «Бекболат» деп.  
Бекболат бола калса ту көтерген,  
Бүйрық кылды: «дарға асып, тарт!» деп.

Қалиғұлды бірге жазды дарасына,  
Байбосын қоса кетті арасында.  
Абақтыда қалғандар естен танды,  
Көзінің қамышы тиіп қарасына.

Әкетті байғұстарды арбаға сап:  
«Иманыңды айтатын молданы тап,  
Үндерінді шығарма, өңкей надан,  
Мұнан былай сөйлеме, аузыңды жап!» [4].

Бұл оқиганың Жамбыл тарапынан нақты, шыныайы тұргыдан сипатталғанын тарихи құжаттар дәлме-дәл дәлелдейді. Мысалы, Отар участекісінің приставы 1916 жылы 9-шілдеде Верный уезінің начальнигі атына арнайы хаттама түсірғен [5]. Онда 8-шілде күні бір мын адам жиналған «Үлкенсаз» жайлауында пристав қазақтарды патша жарлығымен таныстырыған кезде Қарғалы, Бидалы, Күрті, Ұзынағаш болыстарының бір топ жақсылары мен ақсақалдары жарлыққа қарсы шыққаны айтылады. Олар: «Әскерге адам бермейміз! Атқа қонамыз! Соғысқа барып өлгенше,

осында өлгеніміз артық!» – деседі. Отар приставы түсіндіріп те, қорқытып та байқайды, бірақ одан еш нәтиже шықпайды.

Приставтың жанында осы жиылдыста Қарғалы болысы – Сандыбай Шаңбаев, Бидалы болысы – Қырбас Ботабаев, Күрті болысы – Қасембай Айғожин, Ұзынағаш болысы – Есдәulet Асылбеков, полиция бастығы Федор Брянцев, Ботпай болысының писарі А.Бронников және шабарман Қысым Ақмұрзин болған екен [6]. Пристав осыларды болған оқиганың күәгері ретінде алға тартады. Сейтіп пристав патша жарлығына қарсы шыққан ел жақсылары мен ақсақалдардың тізімін жасап, оны уезд бастығына жеткізеді. Кейіннен 16-шілде күні сол тізім бойынша Верный түрмесіне жаңағы аталған 4 болыстың 34 адамын әскер жіберіп, айдал әкеліп қамайды.

Архив құжаттарына қарағанда, олар: Қарғалы болысынан: Әмір Төлеубаев, Садық Рысбеков, Тайсабай Дайырбеков, Есбай Медеуов, Әбиір Жәнібеков, Игібай Балғабаев, Жәншік Әлденов, Үмбетбай Әбліов; Бидалы болысынан: Қасымбек Бақтияров, Есенқұл Күртібаев, Әбдираим Бөлшекбаев, Туматай Жанқұлы, Байбосын Шалтанбаев, Жексембі Найманбаев, Байғабат Байшүгіров; Күрті болысынан: Түгелбай Танқышов, Әлекбай Тастанбеков, Әбділда Кенсатов, Жарқымбай Маденев; Ұзынағаш болысынан: Әлімбай Оспанов, Бөлшекбай Байбақов, Кенебай Қозыев, Таймасын Менлібаев, Тепселбай Құттынбеков, Ахмет Құлжабаев, Шортанбай Жынынчанов, Ақберген Оспанов, Қондықбай Бекбаев, Абижан Тоқбергенов, Тайтелі Мұрзалин, Шагай Ысмайлолов, Кенебай Баетев, Изембай Сарыбаев, Раҳым Отарбаев [7].

1916 жылы 17 шілдеде аталған адамдарды 3 айға Верный түрмесіне қамау туралы Жетісу облысы әскери губернаторының арнайы қаулысы шығарылады. Артынан олардың үстіне 6 адам әкеліп, тағы қамайды. Олар: Күрті болысынан – Қожмамбет Қылыбаев, Асқар Ибрағимов, Изембай Нұрабаев, Иманәлі Байхожин, Ұзынағаш болысынан – Қоқым Майкин және Омар Саркебенов [8].

Міне, сейтіп патша жарлығына наразылық білдіргені үшін ғана аймаққа беделі мен атағы құшті 40 адамды қамауға алып, олардың халықпен байланысын үзеді. Жергілікті патша чиновниктері олардың халық арасындағы ықпалынан және наразылықтың басқа аймақтарға таралуынан қаймығады. Бірақ соған қарамастан патшаның әміріне қарсылық үлкен ереуілдерге ұласады.

Кейінрек қамалғандар сұраққа алынып, тергеліп, патша үкіметі 26 адамды 23-шілдеде тұт-

қыннан босатады. Оған халықтың талап-тілегі, наразылығы себеп болады. Ал қалғандары З ай бойы түрмеде ұсталады.

Ақын аталған жырда Самсыдағы Ботбай көтерілісі жөнінде былай дейді:

Самсыны алған екен Ботпай қамап,  
Оларды жігітімен кетті сабап.  
Тұтқындарды босатып ала алмады,  
Бір пәлеге екінші пәле жамап.

Пристав та Самсыға барған екен,  
Жәнібектің мешітін қамап алған екен.  
Жәнібек қажы жанына ара тұрды,  
Бір болыс ел жиналып барған екен.

Ала алмай күні бойы әлек болды,  
Жәнібек приставқа себеп болды.  
Ертеңіне құтылып Ұзынағашқа –  
Шаңдатып келе жатты қара жолды.

Бөлек-бөлек топтанып шоқтай болып,  
Бай көпесті өлтірді Ботпай болып.  
Қолына онан басқа түк түспеді,  
Кезсе де бұл маңайды әбден шолып [9].

Бұл ереуілдің қысқаша мазмұны былай еді. Майдандағы кара жұмыска адам алу жөніндегі пристав жарлығы Верный-Пішпек жолында орналасқан Самсы бекетінің айналасындағы Ботпай болысы халқын да дүрліктіреді. Жер-жерде жиындар, басқосулар өтеді. Көрші болыстарға хабаршылар жіберіледі. Бас біріктіріп, өзара көмек көрсетудің шарапалары жасалады.

Осы кездегі Ботпай болысының басшысы Қалдыбек Алғадаев тыл жұмысына жіберілетін адамдардың тізімін жасауда белсенделік танытпаған екен. Тіпті ешқандай іс-әрекет жасамаған. Сондықтан Пішпек уезі начальнигінің 1916 жылы 26-шілдедегі Жетісу облысы әскери губернаторының атына жазған рапорты бойынша 1916 жылы 3-тамызда тұра көтеріліс қарсаңында Жетісу облысы әскери губернаторы Фольбаумның бұйрығымен Қ. Алғадаев болыстық қызметінен алынып, оның орнына бұрынғы болыстыққа кандидат болып жүрген Қасен Әжібаев тағайындалады [10]. Бірак бұдан іс ілгері баспайды. Қайта халықтың ыzasы мен кегі шегіне жетіп, дауылды шақ жақындей түседі.

6-тамыз күні кешкес қарай әскерге жігіт жинауға келген Отар учаскесінің приставы мен оның жендеттеріне қарсы халық наразылығы басталады. Самсыны Ботпай болысының және көрші болыстардан көмекке келген 5 мың адам қоршап алады. 1916 жылы 7-тамызда Түркістан өлкесінің генерал-губернаторы А.Н.Куропат-

киннің атына жіберілген жедел телеграммада Жетісу облысы әскери губернаторы М.А.Фольбаум Самсыдағы қазактардың көтерілісі туралы былай деп хабарлайды: «Сегодня вечером скопища киргизов Ботпаевской, Восточно и Западно-Кастекских, Ргайтинской и Тайторинской волостей Верненского уезда в районе ст. Самсы оказали явное неповиновение отарскому участковому приставу и проявили враждебность, испортив телеграф и нарушив правильность почтового движения. ... Для наказания бунтовщиков и охраны русских селений высланы войска» [11].

Міне, сол шақта атагы осы аймаққа белгілі, елге беделді Майлабайұлы Жәнібек қажы көтерілген қарусыз халықтың келешегін ойлап, олардың өмірін сақтап қалу, патша жандаралдары сөзсіз қаулатып жіберетін әскерінің қатал жазалау шарапаларын жұмсартып, тіпті, мүмкін болса, бетін қайтару үшін пристав пен жиналған елдің арасына жан дәрмендеп арашага түседі. 7-тамыз күні таңертең приставы бар, поча ұстаушысы бар топ шағын әскери отрядпен Ұзынағаш, Верныйға қарай қашып шығады.

Кейіннен, қыркүйек айында Отар учаскесінің приставы мен Самсы пошта станциясының пошта ұстаушысы Никитин біраз жасағымен бірге 7-тамызда таңертеңгі сағат 6-да 3-4 пәуескемен Казано-Богородское селосына (Ұзынағашқа) қашып шыққандығын мойындауға мәжбүр болады [12]. Көтерілісшілер пошта бекетін, телеграф бағаналарын талқандаған. Бірнеше орыс мұжықтарын, көпестерді қолға түсіріп, тұтқындаиды.

Самсы көтерілісінің дабыры патша жандаралдарының бір-біріне жіберген жедел телеграммалары мен хаттары арқылы Верный, Ташкент, Петроградқа дейін жетеді. Жедел түрде әскери отрядтар жасақталып, көтерілісті басып-жаншуға жөнелтіледі. Алғашында Самсыға есауыл Бакуревичтің жазалаушы отряды жіберілген екен. Тен емес шайқастарда екі жақтан да шығын болып, біраз қазактар қолға түседі. Жендеттер бейбіт халықты талайды. Пошта жолын қалпына келтіру үшін хорунжий Александров басқарған тағы бір жүздік әскер жіберіледі. Есауыл Бакуревичтің отряды Тоқмақтагы көтерілісті басуға жіберілгендеңдіктен Самсыға енді Верный дружинасынан прaporщик Махонин бастаған рота экелінеді [13]. Сөйтіп, Қастек, Тарғап, Отар, Самсы көтерілістері тамыздың ортасына қарай көрші Пішпек уезінің жеріне, Тоқмақ аймағына ауысады.

Патшаның зілді бұйрығы шілде айының басында Верный уезі Батыс Қастек болысы жүртү-

на да келіп жетеді. Жарлықпен таныстыру үшін болыс басшылары Шығыс Қастек, Батыс Қастек, Шиен болыстарының адамдарын жинап, жалпы жиналыс өткізеді. Онда осы аймақта беделі мен ықпалы бар Сарымсақ Шынтеміров, Ахмет Қожамқұлов, Сейдалы Садыбеков, Нақысбек Қанаев, Досқожа Қашағанов, Нұке Сатыбеков, Қашаған Рысқұлбеков, Тайжан Шынтеміров, Бейсебай Қасқарауов, Әбдікерім Сәмбетов, Рахмат Андосов, Керімбай Қожамбердиев, Алакүшік Ұлтанов, Сандыбай Жаманқұлов сияқты азаматтар сөз сөйлеп, әскерге адам бермейтіндіктерін, патша жendetтеріне қарсы шығудын керектігін ашық айтады.

Бұл кезде болыстар әскерге алынатындардың тізімін жасап та қойған еді. 200-ден астам тізімге іліккен адамның аты-жөні осы жиналыста оқылады. Олардың көпшілігі кедей, жарлы-жақыбайлардың балалары еді. Жалпы жиналыс таяу арада көтеріліс жасау керек деп шешеді. Қөршілес жатқан болыстарға адамдар жіберіледі. Нұрғожа Тұргенбаев, Қекбай Қаскоров, Рысжан Елекенов сияқты ұсталар найдза, қыльыш, айбалта, шокпар жасауға кіріседі [14]. Ұрыс жоспары жасалып, патша солдаттары бекінген Шиен, Бұрған бекеттеріне шабуыл жасап, басып алу белгіленеді. Жұрт осы көтерілістің басшылары, қолбасшылары етіп Сатай Қебегенұлы Қарашевті және осы өнірге белгілі аңшы-мерген Нұке Сатыбековті сайлайды. Көтерілісшілерде отты қару жоқтың қасы еді. Тек Нұке Сатыбеков бастаған бірнеше адамдаған мылтық болған.

Үкімет жансыздары арқылы дайындалып жатқан көтеріліс туралы біліп алғып, оның алдын алу шараларын ұйымдастырады. 1916 жылдың 6-тамызда Қастекке Верныйдан қаруланған 250 адамдық жазалаушы отряд шығарылады. 7-тамыз күні ұзынқұлақтан хабар алған жергілікті ел-жүрттың қару ұстасуға жааралық азаматтары Шиен маңындағы Қаратобеге жиналады. Жиналған мынан аса сарбаз үш топқа бөлініп, патша отрядына жан-жақтан шабуылға шығады. Сатай Қебегенұлы 200 жігітпен сақадай-сай қаруланған жауға қарсы шабады. Ер Сатайға оқ тиіп, ат үстінен аударылып түседі. Көтерілісшілер қаптал түстан да лап береді. Бірақ жазалаушы топ көтерілісшілерді жаңбырдай жауған оқпен қарсы алады. Осы ұрыста ер Сатай бастаған оннан астам азамат ерлікпен қаза табады. Солдаттар да шығынға ұшырайды. Ұрыс барысында Нұке Сатыбеков бастаған мерген аңшы жігіттер Шиен мұжығы Москаленконы, жазалаушы отряд басшысы Пешковты атып өлтіреді [15]. Батыс Қас-

тек, Шиен болыстарындағы көтерілістер осылайша аяқталады. Қарусыз халық амалсыздан тау-тасқа шегінуге мәжбүр болады.

Патша әскерлері кейіннен Сүйкітөбеле қарай шегініп, қыргыз аспақ болған топты күп жетіп, атқылап, қанды қырғын салады. Көтеріліс басылған соң оның үйымдастырушылары болған бір топ азаматты патша әскерлері тұтқынға алып, тергеп, сотқа тартады. Қөшпілігін дарға асу арқылы өлім жазасына кеседі. Тек, 1917 жылғы патша өкіметін құлатқан Ақпан революциясынан кейін Уақытша үкімет бұл шешімді өзгертерді. Тұрмедегі Қастек көтерілісінің жетекшілері босатылады.

Міне, осы Батыс Қастек, Шиен болысындағы 1916 жылдың тамыз айында болған ұлт-азаттық көтерілістің жайын ұлы ақын Жамбыл Жабаев өзінің «Зілді бұйрық» деген өлеңінде былай баяндайды:

Шиенде де әскерлермен ұрыс болды,  
Сол ұрыста топ басы Саттар өлді [16].  
«Саттар өлді, ел қашты» деген хабар,  
Ел елдерге жайылды оң мен солды.  
Шұбырып, тауға қарап ел жөнелді?  
Не боларын соңынан кім біледі?  
Тауға қашып өрмелеп тасқа бұғып,  
Елдін бәрі жанынан түнілді енді.  
Ертеңінде ел-елге әскер барды,  
Шапшаң түсіп, келсін деп хабар салды.  
«Қашындарды атады» дегеннен соң,  
Таудағылар кірер жер таба алмады.  
... Аттандық ұлығының қонысына,  
Елді сорған борсықтай болысына.  
Көп ерлер қаза тапты жауға аттанып,  
Көксеген азаттықтың соғысында [17].

Жамбылдың «Патша әмірі тарылды» деген жырында да маусым жарлығының шығуы, еңбекші халықты екі жақты қанаудың бүріншідан да қүшегені айттылады. Езілген елдің ұлдарын қара жұмысқа алумен қоймай, халықты ата қонысынан, жер-судан айырды, өрісін тарылтты дейді. Жергілікті ұлықтардың патша жарлығын орындау үшін елдің дүниесін, үйлерін тінтіп, елді тонауға кіріскеңі көрсетіледі. Ақын көтеріліс алдындағы осындай ауыр, аласапыран жағдайдағы бұқара халықтың ыза-кек намысын, ойпікірін:

Бұйтіп көрген күн құрсын,  
Жапырактай қалтырап.  
Таусылғандай тынысын,  
Күнде жүрек кансырап [18] –

деп білдіреді.

Жалпы Жамбыл жырларында көтерілістің тууы, өрбүі, халықтың сана-сезімі оянуы жанжақты жырланады. Жарлық жарияланған соң оған қарсы күрес жасауға бел байлаған қарулы көтеріліс Жетісу өлкесінде кең өріс алды. Жая, Касқасу, Ушқоныр, Құмбел, Үлкенсаз, Қарақия, Майтөбе, Қарабастау, Құлансаз жайлауларында жалғас отырған елдер хабарласып, патша үкіметіне қарсы соғысуға бәтуа жасаған.

«Патша әмірі тарылды» өлеңі сол оқиға ізімен шықкан. Ел Жәкеңнің өлендерін жаттап әкеткен. Кейін көтеріліс саябырласа да Жамбылдың өлендері ел аузында сакталып қала берген. Гали Орманов жазып алған «Патша әмірі тарылды» өлеңі 1946 жылы ұлы ақынның туғанына 100 жыл толу мерекесіне арналып шығарылған толық шығармалар жинағында алғаш рет жарияланды.

Жамбыл жырларының ерекшелігі – тарихи оқиғаның айқындығында, мазмұн жағынан салмақтылығында, терен мағыналығында. Ең бастысы ақын жеке ерлікті ғана дәріптемей, батырлардың іс-әрекетін жалпы халықтық күрес ретінде көрсетіп, олардың рухын жаңа бір сатыға көтереді.

Жамбыл ақын 1916 жылдың батырлары туралы толғанғанда сөз нөсерін төгілте, түйдектете, әселі етіп айтады. Қарт ақын бүтінгі ұрпақ-қа Амангелдінің патриоттық, батырлық істерін өнеге етіп ұсынады.

Батыр бол, балаларым, бәрін-дағы,  
Тап берген дүшпан иттің сынсын сағы  
Семсерін Амангелді тот баспасын,  
Ел қорға, ұлы күннің туса шағы, [19] –

дейді.

Жамбыл өлендерінде тек қайғы, ауыр жағдай ғана емес, сонымен бірге үміт сәулесі бар. Оны 1940 жылы Жамбылдың бірінші томында жарияланған «Халық кегі» деген өлеңінен байқаймыз:

Бой бермес ел өмірі, асау шері,  
Тұрса да құрсауланып токсан жері.  
Бірде от, бірде суды көктей көшіп,  
Талпынып тілегіне басты ілгері [20].

Жамбылдың 1916 жылғы Қарқара көтерілісі басшыларының бірі – Жаңабай Құдайбергеновке қатысы да бір қызық оқиға. Бұл мәселе жөнінде кезінде «Жетісу» газетінде айтылған еді [21].

Жамбыл 1881 және 1890 жылдары Жетісудағы Албан еліне барғанда ел-жүрт құрметпен қар-

сы алады. Осы сапарында Қарқара жайлауында өткен бір тойда Албаның алты арысының бірі Құдайбергенмен танысады. Қоңырдан шыққан Құдайберген бала жастан әнші, күйші, елге сыйлы еді. Оның арғы атасы атақты Ханкелді (Райымбек атасынан басқа) батыр, одан Бала-пан би, одан Құлжа, Құлжадан осы Құдайберген. Құдайбергенге дәulet бітіп, сәулет қонған. Ол Суан еліндегі атақты Әжібек қажының қызы Балдайға үйленген. Жамбылға Қарқара жерінде осы Құдайберген серік болады. Ол ақынды қонақ қылып ел-елге ертіп жүреді.

Осы кезде Стамбул сапарынан елге Құдайберген мен Балдайдың тұңғыш ұлы Жаңабай келді. Ол 1865 жылы Алматы облысы қазіргі Үй-ғыр ауданы Қырғызсай деген жерде туған. 1890 жылы Жамбылмен кездескен шақта жиырма бестегі қылышылдаған жас, білім алған, көптеген ел-жер көрген жігіт. 1871-1877 жылдары Әжібек нағашы атасының қолында болып тәрбие алған, медресе бітірген, Әжібек қажы мен үйғыр саудагері Үәлибайдың қызметінде болып, Қашқар, Монгол, Қытай, Сібір, Ресей, Орта Азия, Қырым, Кавказ, Ауган, Иран, Ирак, Түрік жерлерін ара-лаган. Орыс, қытай, араб, үйғыр тілдерін білген. Көргені де, білгені де көп, өзі шешен, өзі зерек, ақыл-ойдың иесі жас жігіт екен. Жамбыл мен Жаңабай бір көргеннен тіл табысады. Оған Жамбыл жоғары баға береді. Жамбыл Құдайберген ауылының сыйлы қонағы болып он күн жатады. Жамбылдың құрметіне Жаңабай аламан бәйге, жорға бәйге, қызы күу, жамбы атқызу, күрес, айт-ыс, көкпар үйымдастырады. Қарқара, Шалқөде, Қөлсай, Айғайтас, Қөкарша, Қарапаша, Алтын-кен, Аспан, Хасан тауларының көрікті жерлерін аралатады. Жамбыл осы күндері Жаңабайдың ақбақай торы атын мініп жүреді. Жаңабайдың жүріс-тұрысы, ақылы Жамбылға ұнағаны сонша Жаңабайға арнап көлемді жыр шығарады. Одан үзінді келтірелік:

Жаңабай жас арыстан, өзі шешен,  
Орыс, қытай, үйғырдың тілін білген.  
Қашқар, Монгол, Қытай мен Ресейдің,  
Иран, Ирак, Түріктің жерін көрген.  
Аралап алатаулық қырғыз елін,  
Өзбек, Түркменнің көрген жерін.  
Сібір, Алтай, Атырау, Кавказ, Қырым,  
Қазақтың аралаган тау, тас, төрін.  
Естідім Жаңабайдың жүрген жолын,  
Жаңабай жігіт екен аскан дарын.  
Байқайтын алды-артын, оң мен солын,  
Қазақтың маңдайына туған бала,  
Жаңабай қалар мәңгі ел есінде...

Бұл өлең жолдарын тарихшы, журналист Құрман Қожа-Ахмет Алғазыұлы Шарғын ақынан жазып алған екен.

Кейіннен Жаңабай Құдайбергенов 1916 жылғы Жетісудағы Қарқара ұлт-азаттық көтерілісі басшыларының бірі болады. Патша үкіметінің жендеттері оны ұстап, аяқ-қолына кісен салып, Қарақол түрмесіне қамайды. 12-тамызда оның серіктегі – Қарқара көтерілісінің көрнекті басшылары Ұзақ Саурықов, Жеменеке Мәмбетов, тағы басқалармен бірге «тұрмаден қашуға әрекет жасады» деген жалған сұлтаумен атқызып тастайды. Ол батыр, қолбасшы болған. Ұйғыр ауданының орталығы Шонжы селосының орталық алаңында оның және көтерілістің бір топ құрбандарының аты жазылған қызыл мәрмәр ескерткіш түр. Шонжының бір көшесі Жаңабай Құдайбергенов

көшесі деп аталады. Қарқарада «Ереуіл төбе» деген қасиетті төбеде Қарқара ұлт-азаттық көтерілісінің бір топ басшысын мәңгі еске қалдыру үшін зәулім ескерткіш орнатылған. Сол ескерткішке Жаңабай Құдайбергенов есімі алтын әріппен ойылған. Сонымен Жамбыл ақынның айтқаны келіп, Жаңабай өзінің ерлік ісімен ел есінде қалды.

1916 жылғы көтеріліс және оны ұйымдастырушылар мен оған қатысушылар туралы халық ақынының бірнеше жыры бар. Өйткені, шын ақын өз айналасында болып жатқан оқиғалар мен құбылыстардан тыс қала алмайды. Әсіресе, өз халқының тағдыры шешіліп жатқанда ақын шамасы келгенше тарихи шындықты дәл беруге тырысқан. Сондықтан 1916 жылғы ұлт-азаттық көтеріліс – Жамбыл ақын шығармашылығындағы ең негізгі тақырыптардың бірі.

### Әдебиеттер

- 1 Жабаев Ж. Екі томдық шығармалар жинағы. 1-том. – Алматы, 1982. 58 б.
- 2 Бұл да сонда, 59-б.
- 3 Жабаев Ж. Шығармаларының толық жинағы. – Алматы, 1946. – 663 б.
- 4 Жабаев Ж. Екі томдық шығармалар жинағы. 1-том. – Алматы, 1982. – 59-60 бб.
- 5 Қазақстан Республикасы Орталық мемлекеттік архиві (KROMA), 44-кор, 1-тізім, 19573-іс, 3-парақ.
- 6 KROMA, 44-кор, 1-тізім, 19573-іс, 3-парақ.
- 7 KROMA, 44-кор, 1-тізім, 19573-іс, 5-парақ.
- 8 KROMA, 44-кор, 1-тізім, 19573-іс, 9-парақ.
- 9 Жабаев Ж. Екі томдық шығармалар жинағы. 1-том. – Алматы, 1982. – 60-б.
- 10 KROMA, 44-кор, 1-тізім, 19743-іс, 1, 6-параптар.
- 11 Восстание 1916 года в Средней Азии и Казахстане. Сборник документов. – М., 1960. – 332-333 бб.
- 12 KROMA, 44-кор, 1-тізім, 28881-іс, 132-парақ.
- 13 Восстание 1916 года в Средней Азии и Казахстане. Сборник документов. – М., 1960. – 336 б.
- 14 Национально-освободительное восстание казахских трудящихся против царизма в 1916 г. Сборник воспоминаний и материалов. – Алматы, 1937. – 142-б.
- 15 Восстание 1916 года в Казахстане. Документы и материалы. – Алматы, 1947. – 122-123 бб.
- 16 Саттар – Сатай болуы керек.
- 17 Жабаев Ж. Екі томдық шығармалар жинағы. 1-том. – Алматы, 1982. – 61 б.
- 18 Жабаев Ж. Екі томдық шығармалар жинағы. 1-том. – Алматы, 1982. – 58 б.
- 19 Жабаев Ж. Шығармаларының толық жинағы. – Алматы, 1946. – 228 б.
- 20 Жабаев Ж. Екі томдық шығармалар жинағы. 1-том. – Алматы, 1982. – 61 б.
- 21 Құрман Қожа-Ахмет. «Қарқара» деректі хикаясы. – «Жетісү» газеті, 25 караты 1994 ж.

### References

- 1 Zhabaev Zh. Eki tomdyk shygarmalar zhinagy. 1-tom. – Almaty, 1982. – 58 b.
- 2 Bul da sonda, 59-b.
- 3 Zhabaev Zh. Shygarmalarynyн tolyk zhinagy. – Almaty, 1946. – 663 b.
- 4 Zhabaev Zh. Eki tomdyk shygarmalar zhinagy. 1-tom. – Almaty, 1982. – 59-60 bb.
- 5 Kazakstan Respublikasy Ortalyk memlekettik arhivi (KROMA), 44-kor, 1-tisim, 19573-is, 3-parak.
- 6 KROMA, 44-kor, 1-tisim, 19573-is, 3-parak.
- 7 KROMA, 44-kor, 1-tisim, 19573-is, 5-parak.
- 8 KROMA, 44-kor, 1-tisim, 19573-is, 9-parak.
- 9 Zh.Zhabaev. Eki tomdyk shygarmalar zhinagy. 1-tom. – Almaty, 1982. – 60 b.
- 10 KROMA, 44-kor, 1-tisim, 19743-is, 1, 6-paraktar.
- 11 Vosstanie 1916 goda v Srednei Asii i Kazahstane. Sbornik dokumentov. – M., 1960. – 332-333 bb.

- 12 KROMA, 44-kor, 1-tisim, 28881-is, 132-parak.
- 13 Vosstanie 1916 goda v Srednei Asii i Kazahstane. Sbornik dokumentov. – M., 1960. – 336 b.
- 14 Natsionalno-osvoboditelnoe vosstanie kazachskih trudiashihisia protiv tsarisma v 1916 g. Sbornik vospominanii i materialov. – Almaty, 1937. – 142 b.
- 15 Vosstanie 1916 goda v Kazahstane. Dokumenty i materialy. – Almaty, 1947. – 122-123 bb.
- 16 Sattar – Satai boluy kerek.
- 17 Zhabaev Zh. Eki tomdyk shygarmalar zhinagy. 1-tom. – Almaty, 1982. – 61 b.
- 18 Zhabaev Zh. Eki tomdyk shygarmalar zhinagy. 1-tom. – Almaty, 1982. – 58 b.
- 19 Zhabaev Zh. Shygarmalarynyн tolyk zhinagy. – Almaty, 1946. – 228 b.
- 20 Zhabaev Zh. Eki tomdyk shygarmalar zhinagy. 1-tom. – Almaty, 1982. – 61 b.
- 21 Kurman Kozha-Ahmet. «Karkara» derekti hikaiasy. – «Zhetisu» gazeti, 25 karasha 1994 zh.